

নিরাক্ষা

এপ্রিল-জুন ২০২৫

প্রেস ইনস্টিটিউট বাংলাদেশ (পিআইবি)-এর গণমাধ্যম সাময়িকী, ২৫৪তম সংখ্যা



গণমাধ্যম ও রাজনীতি

নিউজফ্লুয়েন্সার

অনলাইন কনটেন্ট নির্মাণ ও প্ল্যাটফর্মভিত্তিক
সাংবাদিকতার ছেদবিন্দু

লেখক: এডওয়ার্ড হুরকোম্ব

তর্জমা: উসামা রাফিদ

২

০২০ সাল। যুক্তরাষ্ট্রের প্রেসিডেন্ট নির্বাচন চলছে। টেলিভিশন সংবাদ পাওয়ার অন্যতম দ্রুত ও জনপ্রিয় মাধ্যম হওয়া সত্ত্বেও দেশটির অনেক তরুণ-তরুণীর চোখ ওদিন রাতে টেলিভিশনের ওপর ছিল না। নির্বাচনের লাইভ আপডেট আর ফলাফল বিশ্লেষণের জন্য তাঁরা চোখ রাখছিল স্ট্রিমিং প্ল্যাটফর্ম টুইচে, বিশেষ করে হাসান পাইকারের চ্যানেলে। ২৯ বছর বয়সি হাসান পাইকার সেদিন তাঁর বাড়ির স্টুডিয়ো থেকে টানা ১১ ঘণ্টা লাইভ স্ট্রিম করেছিলেন (Lorenz, 2020), আর তাঁর সেই স্ট্রিমটি দেখা হয় ৪৫ লাখেরও বেশিবার। স্ট্রিমটি টেলিভিশনের মতো সাজানো-গোছানো ছিল না, বরং অনেকটাই এলোমেলো ও গতিময় ছিল। হাসান বারবার বিভিন্ন ওয়েব ব্রাউজারের ট্যাব, টুইটার ফিড আর টুইচের চ্যাটিং ইন্টারফেসে ঘুরপাক খাচ্ছিলেন, যাতে তাঁর দর্শকরা ভোটের ফলাফল বের হওয়ার সঙ্গে সঙ্গে আপডেট থাকতে পারেন। তরুণ দর্শকদের মতে, এ ধরনের গতিশীল উপস্থাপনাই তাঁদের নিজেদের খবর দেখার অভ্যাসের সঙ্গে মিলে যায়। এমনকি ডিজিটাল সম্প্রচারমাধ্যম ভাইসও এই ধরনের প্রচারকে ‘নির্বাচন কাভারেজের ভবিষ্যৎ’ হিসাবে আখ্যা দিয়েছে (Jackson, 2020)।

তরুণ দর্শকদের কাছে হাসান পাইকার একাধারে একজন রাজনৈতিক ভাষ্যকার এবং সংবাদ তথ্যের উৎস। শুধু যুক্তরাষ্ট্র নয়, সারা বিশ্বেই তরুণরা এখন সংবাদ জানার জন্য মূলধারার গণমাধ্যমের বদলে টিকটক, ইনস্টাগ্রাম, ইউটিউবের মতো প্ল্যাটফর্মের দিকে ঝুঁক পড়ছে। পশ্চিমা দেশগুলোর বাইরেও লাতিন আমেরিকা, আফ্রিকা এবং এশিয়া-প্যাসিফিক অঞ্চলে টিকটকের মাধ্যমে সংবাদ জানার প্রবণতা দ্রুত বাড়ছে (Digital News Report, 2023)। এই তরুণ ব্যবহারকারীদের অর্ধেকেরও বেশি এখন প্রচলিত সাংবাদিকতার চেয়ে ইনফ্লুয়েন্সার বা তথাকথিত ‘অসাংবাদিক’ সূত্র থেকে খবর জানতে বেশি আগ্রহী (Digital News Report, 2023)। মূলধারার সাংবাদিকদের বাইরে হাসান পাইকারের মতো রীতিবিরুদ্ধ সংবাদদাতাদের সাফল্য বোঝায় যে কেবল সংবাদ দেখার ধরনই বদলাচ্ছে না, বরং সাংবাদিকতা, ইনফ্লুয়েন্সার সংস্কৃতি ও ডিজিটাল কনটেন্ট ক্রিয়েটরদের অর্থনীতির মধ্যেও পারস্পরিক মেলবন্ধন তৈরি হচ্ছে এবং এটি সাংবাদিকতার চরিত্রকেই পরিবর্তন করে ফেলছে।

লেখক

সিনিয়র লেকচারার, স্কুল অব মিডিয়া
অ্যান্ড কমিউনিকেশন, রয়্যাল মেলবোর্ন
ইনস্টিটিউট অব টেকনোলজি

তর্জমা

উসামা রাফিদ, লেকচারার, ডিপার্টমেন্ট
অব মিডিয়া স্টাডিজ অ্যান্ড জার্নালিজম,
ইউনিভার্সিটি অব লিবারেল আর্টস
বাংলাদেশ (ইউএলআব)

এই প্রবন্ধে ‘নিউজফ্লুয়েন্সার’ (newsfluencer) শব্দটিকে ধারণাগতভাবে ব্যাখ্যা করা হয়েছে হাসান পাইকারের মতো নতুন ধরনের সংবাদ নির্মাতাদের বোঝাতে। নিউজফ্লুয়েন্সার বলতে বোঝানো হচ্ছে এমন ডিজিটাল কনটেন্ট ক্রিয়েটরদের, যাঁরা অনলাইন ইনফ্লুয়েন্সারদের অর্থনৈতিক ও সাংস্কৃতিক কৌশল অনুসরণ করে খবর তৈরি করেন এবং সেটি সক্রিয়, অংশগ্রহণকারী দর্শকদের সামনে উপস্থাপন করেন। এই অর্থনৈতিক কৌশলের মধ্যে রয়েছে প্ল্যাটফর্মকেন্দ্রিক, উদ্যোক্তাসদৃশ সাবস্ক্রিপশনভিত্তিক আয়ের মডেল। অন্যদিকে সাংস্কৃতিক দিকটি মূলত গড়ে উঠেছে অনলাইন ফ্যানডম এবং সম্পর্কমূলক শ্রমের (relational labour) মাধ্যমে ‘প্যারাসোশিয়ালিটি’ তৈরি করে। এ সংজ্ঞা অনুসারে সংবাদ কনটেন্ট এমন বিষয়বস্তু/কনটেন্ট বোঝাচ্ছে, যা সামসময়িক ঘটনা ও বিষয়ের ওপর প্রতিবেদন বা মন্তব্য করে, তবে এটি পেশাদার সাংবাদিকতা নাও হতে পারে। নিউজফ্লুয়েন্সারদের পেশাদার পরিচয়ের প্রতিফলন ঘটাতে সংবাদ কনটেন্টকে এভাবে সংজ্ঞায়িত করা হয়েছে। তবে সামনে বলা হবে, অসংখ্য প্রতিষ্ঠিত সাংবাদিকও সামাজিক মাধ্যমের এনগেজমেন্টের কৌশল, শ্রোতাদের পরিবর্তিত প্রত্যাশা ও চাকরির অনিশ্চয়তার প্রতিক্রিয়ায় সংবাদ তৈরি এবং তা থেকে অর্থ উপার্জনের জন্য নিউজফ্লুয়েন্সার মডেলের দিকে ঝুঁকছেন।

বর্তমানে এ ধরনের সংবাদ নির্মাতাদের বোঝাতে বিভিন্ন শব্দ ব্যবহৃত হচ্ছে, যেগুলোর বেশির ভাগই নির্দিষ্ট প্ল্যাটফর্ম বা বিচ্ছিন্ন কেস স্টাডির ভিত্তিতে তৈরি। এর মধ্যে রয়েছে ‘ইউটিউবার সাংবাদিক’ (Lichtenstein, Herbers, and Bause, 2021), ‘সাংবাদিক-ইনফ্লুয়েন্সার/journo-influencers’ (Leinonen, 2022) এবং ‘রাজনৈতিক ইনফ্লুয়েন্সার’ (Fischer, Kolo, and Mothes, 2022)। কিন্তু ‘নিউজফ্লুয়েন্সার’ শব্দটির মাধ্যমে এ বৈচিত্র্যময় সংজ্ঞামূলক বিভ্রান্তি দূর করা সম্ভব এবং একই সঙ্গে বিভিন্ন প্ল্যাটফর্মে কাজ করা স্বতন্ত্র সংবাদ নির্মাতাদের পরিপূর্ণ বিশ্লেষণ করতেও শব্দটি সাহায্য করে। প্রাতিষ্ঠানিক এবং ‘অপ্রাতিষ্ঠানিক/পেরিফেরাল’ (Schapals 2022) উভয় ধরনের ক্রীড়নকদের উদাহরণ ব্যবহার করে চারটি পরস্পর সম্পর্কযুক্ত দিক থেকে নিউজফ্লুয়েন্সারদের ব্যাখ্যা করা হবে: প্ল্যাটফর্ম, ব্যবসায়িক মডেল, শ্রম ও সংস্কৃতি। আমি দেখাব নিউজফ্লুয়েন্সাররা কীভাবে বর্তমান বৈশ্বিক সংবাদজগতের কিছু অন্তর্নিহিত সংকটের বাস্তব প্রতিচ্ছবি। এই সংকটগুলোর মধ্যে রয়েছে ব্যক্তিকেন্দ্রিকতা ও অনিরাপদ কর্মজীবন এবং ক্রমেই বাড়তে থাকা পক্ষপাতদুষ্ট ও প্ল্যাটফর্মনির্ভর সংবাদের সংস্কৃতি। তবে এর মধ্যে তরুণ দর্শকদের কাছে সাংবাদিকতাকে আরও সহজবোধ্য ও প্রাসঙ্গিক করে তোলার পাশাপাশি ফিল্যান্সারদের জন্য নতুন আয়ের উৎস তৈরির সম্ভাবনাও রয়েছে। পরিশেষে আমি নিউজফ্লুয়েন্সার

প্ল্যাটফর্ম, বিষয়বস্তু এবং অনুশীলন নিয়ে ভবিষ্যতের গবেষণার জন্য একটি রূপরেখা তুলে ধরেছি।

নিউজফ্লুয়েন্সারদের মূল বৈশিষ্ট্যগুলো

দুই দশক ধরে ডিজিটাল প্ল্যাটফর্ম ও অংশগ্রহণমূলক সংস্কৃতির কারণে সংবাদশিল্পে বিরাট পরিবর্তন সাধিত হয়েছে। একদিকে ‘বৈধ’ সংবাদের প্রান্তসীমা থেকে নতুন ডিজিটাল সংবাদ নির্মাতারা উঠে আসছেন (Schapals, 2022), অন্যদিকে সাংবাদিকদের ওপর প্ল্যাটফর্মে নিজেদের আত্মপ্রচার (সেলফ-ব্র্যান্ডিং) এবং দর্শক-শ্রোতার সঙ্গে ‘অকৃত্রিম’ভাবে মোলাকাতের চাপ তৈরি হয়েছে (Molyneux, Holton, and Lewis, 2018)। প্রথমটির উদাহরণ হচ্ছে, ওয়েব ২.০ যুগের ব্লগার ও ‘সিটিজেন সাংবাদিক’ এবং একবিংশ শতাব্দীর শুরুতে প্রযুক্তিসচেতন তরুণদের প্ল্যাটফর্ম BuzzFeed-এর মতো সংবাদমাধ্যমগুলো (Hurcombe, 2022)। অন্যদিকে দ্বিতীয় ক্ষেত্রে দেখা গেছে প্রযুক্তিসচেতন সাংবাদিকরা অংশগ্রহণমূলক প্ল্যাটফর্ম, ব্যক্তিগত ‘ব্র্যান্ড’ এবং সাংবাদিকতার ‘বস্তুনিষ্ঠতার’ সঙ্গে আপস করে চলেছেন (Bruns 2012)। এই পরিবর্তনের পাশাপাশি, অনলাইনে মাইক্রো-সেলিব্রিটি, ইনফ্লুয়েন্সার এবং অন্য ‘কনটেন্ট ক্রিয়েটর’দের উত্থান ঘটেছে (Abidin 2015), যাঁরা একটি অনিশ্চিত ও প্ল্যাটফর্মনির্ভর অর্থনীতির মধ্যে কাজ করেন। প্রথাগত গণমাধ্যমের তুলনায় এই ব্লগার, ইউটিউবার ও ইনস্টাগ্রাম মডেলরা বেশি ‘অথেনটিক’ হিসাবে বিবেচিত হন, কারণ তারা অংশগ্রহণকারী দর্শকদের সঙ্গে একটি ঘনিষ্ঠ কিন্তু পেশাদার সম্পর্ক গড়ে তুলেই নিজেদের ‘ব্র্যান্ড’ তৈরি করেন এবং তা থেকে আয় করেন (Cunningham and Craig, 2017)।

সংবাদশিল্পকে নতুন করে সাজিয়ে তোলা এবং অনলাইন কনটেন্ট তৈরির প্রক্রিয়াকে রূপ দেওয়া অর্থনৈতিক, প্রযুক্তিগত এবং সাংস্কৃতিক যুক্তির মেলবন্ধন থেকে নিউজফ্লুয়েন্সারদের উত্থান ঘটেছে। নিউজফ্লুয়েন্সারদের সঙ্গে আগের সময়ের ব্লগার, নাগরিক সাংবাদিক এবং ডিজিটাল সংবাদ নির্মাতাদের সঙ্গে কিছু মিল থাকলেও তারা ব্লগারদের তুলনায় বেশি সাংবাদিকসুলভ, নাগরিক সাংবাদিকদের তুলনায় বেশি পেশাদার এবং ওয়েব ২.০ যুগের অপেশাদার ব্লগোস্ফিয়ার থেকে আলাদা একটি সুগঠিত প্ল্যাটফর্ম ক্রিয়েটর অর্থনীতির অংশ। নিউজফ্লুয়েন্সাররা কেবল সেই সাংবাদিকই নন, যাঁরা সোশ্যাল মিডিয়ায় সক্রিয়; বরং তারা কনটেন্ট নির্মাণে পুরোপুরি অনলাইন ক্রিয়েটরদের কৌশলগুলোই বেছে নিয়েছেন। অনেক দিক থেকেই তারা পূর্ববর্তী ধারাগুলোর একটি সমন্বিত রূপ।

আমি প্ল্যাটফর্ম, ব্যবসায়িক মডেল, শ্রম এবং সংস্কৃতির ভিত্তিতে নিউজফ্লুয়েন্সারদের মূল দিকগুলো ব্যাখ্যা করছি। নিউজফ্লুয়েন্সার



প্ল্যাটফর্মমাইজেশন বলতে ডিজিটাল প্ল্যাটফর্মগুলোর সেই কেন্দ্রীয় ভূমিকা বোঝায়, যা নিউজফ্লুয়েন্সারদের কনটেন্ট বিতরণ এবং তা থেকে অর্থ উপার্জনের জন্য অপরিহার্য। এই প্ল্যাটফর্মগুলোর ব্যবহার নিউজফ্লুয়েন্সারদের ব্যবসায়িক মডেলের সঙ্গে ঘনিষ্ঠভাবে যুক্ত, যা একই সঙ্গে উদ্যোক্তাসুলভ (entrepreneurial) এবং অনিশ্চিত (insecure)। এর আরেকটি বৈশিষ্ট্য হলো সাবস্ক্রাইবারভিত্তিক আয়ের ধারা, যা অনেক সময় এই ডিজিটাল প্ল্যাটফর্মগুলো নিজেরাই সরবরাহ করে। নিউজফ্লুয়েন্সার শ্রম মূলত উদ্যোক্তা ও সাবস্ক্রাইবারভিত্তিক ব্যবসায়িক মডেলের সঙ্গে সম্পর্কিত। এর মধ্যে রয়েছে ব্যক্তিগত ব্র্যান্ড তৈরি করা, দর্শকদের সঙ্গে ‘অকৃত্রিম’ (authentic) সম্পর্ক গড়ে তোলা এবং আবেগতাড়িত কাজ করা। নিউজফ্লুয়েন্সার সংস্কৃতি মূলত অংশগ্রহণমূলক এবং এটি তাঁদের ব্যবসায়িক মডেল ও শ্রম অনুশীলনের সঙ্গে সম্পর্কিত। কারণ, এটি ভক্তকেন্দ্রিক (fandom-centric)। এই সংস্কৃতিতে ‘প্যারাসোসিয়ালিটি’ (parasociality) একটি গুরুত্বপূর্ণ বৈশিষ্ট্য, যা নিউজফ্লুয়েন্সার এবং তাঁদের দর্শকদের মধ্যে মিথস্ক্রিয়া বাড়ায়। একই সঙ্গে এটি নিউজফ্লুয়েন্সারদের ভক্ত এবং অন্যান্য প্রতিদ্বন্দ্বী সংবাদমাধ্যমের ভক্তদের মধ্যে বিরোধেরও জন্ম দেয়।

প্ল্যাটফর্মমাইজেশন: কনটেন্ট বিতরণ ও অর্থ উপার্জন

নিউজফ্লুয়েন্সারদের প্রধান বৈশিষ্ট্যগুলোর মধ্যে প্রথমটি হলো প্ল্যাটফর্মমাইজেশন, যেহেতু প্ল্যাটফর্মগুলোর মাধ্যমেই নিউজফ্লুয়েন্সাররা তাঁদের কনটেন্ট বিতরণ এবং অর্থ উপার্জন করেন।

বিতরণের প্ল্যাটফর্ম

নিউজফ্লুয়েন্সাররা প্রধানত ডিজিটাল প্ল্যাটফর্ম ব্যবহার করে সংবাদ বিতরণ করে থাকেন। দীর্ঘদিন ব্যবহৃত প্ল্যাটফর্ম, যেমন: টুইটার, ইউটিউব ও ইনস্টাগ্রামের পাশাপাশি টুইচ ও টিকটকের মতো তুলনামূলকভাবে নতুন প্ল্যাটফর্মও নিউজফ্লুয়েন্সাররা ব্যবহার করে থাকেন। যেমন: প্রথমেই উল্লেখ করা পাইকার কনটেন্ট বিতরণের জন্য মূলত টুইচ ও ইউটিউবের ওপর নির্ভর করেন। অস্ট্রেলিয়ার রাজনৈতিক ভাষ্যকার এবং ‘অনুসন্ধানী সাংবাদিক’ ফ্রেডলিজার্ডজ

মূলত ইউটিউবের সাবস্ক্রাইবারদের জন্য ভিডিও তৈরি করেন, যেখানে তাঁর সাবস্ক্রাইবার সংখ্যা ১.৩ মিলিয়নের বেশি। ইউরোপেও ‘সাংবাদিক ইউটিউবার’-এর সংখ্যা বেড়েছে (Lichtenstein, Herbers, and Bause, 2021)। একইভাবে ব্রাজিলেও বলসোনারোবিরোধী ফেলিপে নেতো নিজের ৪৫ মিলিয়ন সাবস্ক্রাইবারের কাছে ইউটিউবের মাধ্যমে গেম খেলার ভিডিওর পাশাপাশি রাজনৈতিক মতামতও তুলে ধরেন। ইনফ্লুয়েন্সারদের এই কৌশল গ্রহণ করেছেন বেশকিছু বিখ্যাত সাংবাদিকও, যাঁরা টিকটক ও ইনস্টাগ্রামে দারুণ সফল। এর মধ্যে রয়েছেন সিএনএন-এর ম্যাক্স ফস্টার এবং বিবিসির ভিক্টরি ডার্বিশায়ার। এর বাইরে নাগরিক সাংবাদিক, সংবাদ ব্লগার এবং অন্যান্য প্রাথমিক পর্যায়ের ডিজিটাল প্ল্যাটফর্ম ব্যবহারকারীরা অনেকটাই ‘প্রফেশনাল-অ্যামেচার’ ধাঁচের, যাঁরা সংবাদ বিতরণের জন্য দীর্ঘদিন টুইটার (এক্স) ব্যবহার করে আসছেন। এর কারণ হলো, প্ল্যাটফর্মটিতে সঙ্গে সঙ্গে সংবাদ প্রচার করা যায়, সবার জন্য উন্মুক্ত এবং সহজেই তাঁদের খুঁজে পাওয়া যায়।

তবে প্ল্যাটফর্মের ওপর নির্ভর করে সংবাদ বিতরণ করতে গেলে প্রায়ই নিজেদের আগ্রহ এবং প্ল্যাটফর্মের নিজস্ব ব্যবসায়িক স্বার্থের মধ্যে একটা সমঝোতার প্রয়োজন হয়ে পড়ে। যেমন: ইউটিউবের রিকমান্ডেশন অ্যালগরিদম নিউজফ্লুয়েন্সারদের ‘ট্রেন্ডিং টপিক’-এ ভিডিও বানানোর চাপ দিতে পারে এবং একই সঙ্গে এমন থাম্বনেল তৈরি করতে বাধ্য করতে পারে, যা দর্শককে ক্লিক করতে আকর্ষিত করে। এ চাপগুলোও গণমাধ্যম শিল্পের জন্য অপরিচিত নয়। কারণ, গণমাধ্যম শিল্প নিজেই প্ল্যাটফর্মের সঙ্গে যুক্ত হয়ে পড়েছে (Willig, 2022) এবং এর ফলে সংবাদ নির্মাণের ধরনও বদলে যাচ্ছে।

অর্থ উপার্জনে প্ল্যাটফর্ম

প্ল্যাটফর্মগুলো নিউজফ্লুয়েন্সারদের আয়ের গুরুত্বপূর্ণ উৎস। ইউটিউবের মতো প্রতিষ্ঠিত প্ল্যাটফর্মগুলো বিজ্ঞাপনের মাধ্যমে আয়ের সুবিধা দেয়। তবে এর পাশাপাশি এমন কিছু সাবস্ক্রিপশনভিত্তিক প্ল্যাটফর্মের উত্থান ঘটেছে, যেগুলোর মাধ্যমে নিউজফ্লুয়েন্সাররা নিজেরাই সরাসরি আয় করতে পারেন। এরকম প্ল্যাটফর্মের মধ্যে রয়েছে প্যাট্রিয়ন, যেটি ফ্রিল্যান্স সাংবাদিক এবং

কনটেন্ট ক্রিয়েটরদের মধ্যে জনপ্রিয়। এছাড়াও হাইপ্রোফাইল লেখক, ব্লগার এবং রাজনৈতিক বিশ্লেষকদের মধ্যে সাবস্ট্যাক জনপ্রিয় হয়ে উঠেছে, যাদের মধ্যে রয়েছেন প্রযুক্তিবিষয়ক সাংবাদিক ক্যাসি নিউটন এবং বিতর্কিত রাজনৈতিক বিশ্লেষক গ্লেন গ্রিনওয়াল্ড, ম্যাট তাইবিস এবং ব্যারি ভাইজের মতো লেখক (Klein, 2021)।

ওপরের বিষয়গুলো থেকে বোঝা যায় কীভাবে একটি সুগঠিত প্ল্যাটফর্মকেন্দ্রিক চর্চা অনলাইন কনটেন্ট ও নিউজ ইন্ডাস্ট্রিকে রূপান্তর করেছে এবং একই সঙ্গে সংবাদ বিতরণ ও অর্থায়নের নতুন পথ তৈরি করেছে।

ব্যবসায়িক মডেল: সাবস্ক্রাইবারনির্ভর, ঝুঁকিপূর্ণ, এবং উদ্যোক্তাভিত্তিক

নিউজফ্লুয়েন্সারদের ব্যবসায়িক মডেলগুলো একটি নির্দিষ্ট ধারায় একীভূত হতে দেখা যাচ্ছে। এই সাবস্ক্রাইবারনির্ভর, ঝুঁকিপূর্ণ এবং উদ্যোক্তাকেন্দ্রিক ব্যবসায়িক মডেলগুলোই নিউজফ্লুয়েন্সারদের দ্বিতীয় মৌলিক বৈশিষ্ট্যটি গঠন করেছে। এই মডেলগুলো এমন এক নিউজ ইন্ডাস্ট্রি থেকে উঠে এসেছে, যা দিনদিন আরও অনিশ্চিত ও ঝুঁকিপূর্ণ হয়ে পড়ছে।

সাবস্ক্রাইবারনির্ভর

সাবস্ক্রিপশনভিত্তিক প্ল্যাটফর্মগুলো ছোট ও জনপ্রিয়—উভয় ধরনের নিউজফ্লুয়েন্সারদের ক্ষেত্রেই কাজ করে। তবে অনেক ‘তারকা’

সাংবাদিক ও মতামত লেখক তাঁদের ব্র্যান্ড ভ্যালু এবং বিশাল পাঠকগোষ্ঠীর শক্তিকে কাজে লাগিয়ে স্বাধীনভাবে কাজ করতে পারছেন। এর মধ্যে রয়েছেন মার্কিন প্রযুক্তি সাংবাদিক ক্যাসি নিউটন, যিনি ২০২০ সালে দ্য ভার্জের চাকরি ছেড়ে পুরোপুরি সাবস্ট্যাকে মনোনিবেশ করেন (Jeong, 2020)। এই ‘তারকা’দের জন্য সাবস্ট্যাক দারুণভাবে লাভজনক। ভক্সের এক হিসাব অনুযায়ী মার্কিন কলাম লেখক ব্যারি ভাইজ ২০২১ সালে বছরে প্রায় ৮ লাখ ৯০ হাজার মার্কিন ডলার আয় করেছিলেন কেবল সাবস্ক্রিপশন থেকেই (Kafka, 2021)। এর প্রত্যুত্তরে বেশকিছু বড়ো গণমাধ্যম সাবস্ট্যাকের নিউজলেটার মডেল চালু করে। ২০২১ সালে দ্য আটলান্টিক, নিউইয়র্ক টাইমস এবং ফোর্বসসহ বেশ কয়েকটি সংস্থা নিউজলেটার চালু করে, যেখানে জনপ্রিয় লেখক ও সাংবাদিকরা লিখতেন। তাঁদের মধ্যে লেখক চার্লি ওয়ার্জেলের মতো কেউ কেউ সাবস্ট্যাক ছেড়ে পুনরায় এসব সংস্থায় যোগ দিয়েছেন (Klein, 2021)। সাবস্ট্যাকের প্রতিদ্বন্দ্বী হিসাবে ঘোষ্ট এবং বিহাইভের মতো নতুন প্ল্যাটফর্মও গড়ে উঠছে, যা ক্রমবর্ধমান নিউজলেটারকেন্দ্রিক অর্থনীতিরই অংশ।

ঝুঁকিপূর্ণ

যদিও সাবস্ক্রিপশন প্ল্যাটফর্মগুলো অনেকের জন্যই লাভজনক একটা মডেল হিসাবে কাজ করতে পারছে, তারপরও এসব মডেল এমন এক

সংবাদশিল্পের ভেতর থেকে উঠে এসেছে, যা দিনদিন আরও ঝুঁকিপূর্ণ ও অনিশ্চিত হয়ে পড়ছে। ডিজিটাল রূপান্তরের ফলে গত দশকে ইংরেজিভাষী সংবাদমাধ্যমগুলোয় ব্যাপক হারে ছাঁটাই করা হয়েছে। অনেক প্রতিষ্ঠান বন্ধও হয়ে গেছে। ফলে ব্যক্তিকেন্দ্রিক এবং ঝুঁকিপূর্ণ এই ব্যবসায়িক মডেলের প্রচলন বাড়ছে। ব্যক্তিকেন্দ্রিক এই অর্থে যে, টুইটার অ্যাকাউন্টের মাধ্যমে ‘সেলফ ব্র্যান্ডিং’-এর দক্ষতা কাজ পাওয়ার ক্ষেত্রে অত্যন্ত গুরুত্বপূর্ণ হয়ে উঠছে। আবার ঝুঁকিপূর্ণ এই কারণে যে, এর মাধ্যমে যে আয় হবেই, তা নিশ্চিত করে বলা যায় না। এই প্রেক্ষাপটে সাবস্ক্রিপশন প্ল্যাটফর্মগুলো ফ্রিল্যান্স ও স্বাধীন সাংবাদিকদের জন্য আয়ের আরেকটি বিকল্প পথ হিসাবে কাজ করছে। এভাবে বিভিন্ন আয়ের উৎস তৈরি করা গিগ অর্থনীতির অনিশ্চয়তা

মোকাবিলায় সাহায্য করে এবং এর সঙ্গে অনেক সাধারণ কনটেন্ট ক্রিয়েটরদের ব্যবসায়িক কৌশলের সঙ্গে মিল পাওয়া যায় (Glatt and Banet-Weiser 2021, 44)। তবে সাবস্ক্রিপশন প্ল্যাটফর্মগুলো নিজেরাও অনিরাপদ আয়ের উৎস। কিছু ‘তারকা’ নিউজফ্লুয়েন্সার প্ল্যাটফর্ম পার্টনারশিপের মাধ্যমে ভালো পারিশ্রমিক পেয়ে যান বটে; কিন্তু বেশির ভাগ নিউজফ্লুয়েন্সারের আয় তাঁদের সাবস্ক্রাইবার সংখ্যার ওঠানামার ওপর নির্ভরশীল। কারণ, প্রত্যেক সাবস্ক্রাইবারই দীর্ঘ মেয়াদে কোনো ইনফ্লুয়েন্সারকে সাবস্ক্রাইব নাও করতে পারেন, আগ্রহ কমে যাওয়া বা টাকা খরচের গুরুত্ব দুটোই এর কারণ হতে পারে।

এছাড়াও এই ‘তারকা’ ও অপেক্ষাকৃত ছোটো নিউজফ্লুয়েন্সারদের

মধ্যে পারস্পরিক যে সম্পর্ক, তা অনেকটা ইউটিউব, ইনস্টাগ্রাম ও অন্যান্য প্ল্যাটফর্মের ইনফ্লুয়েন্সারদের মধ্যকার সম্পর্কের মতোই (Bishop, 2018)। এসব প্ল্যাটফর্মের খুব কমসংখ্যক কনটেন্ট ক্রিয়েটরই শুধু নিজেদের কনটেন্ট থেকে পাওয়া আয় দিয়ে আরামদায়ক জীবনধারণ করতে পারেন। এ বৈষম্য অবশ্য সাংবাদিকতার জগতেও রয়েছে, যেখানে একপ্রান্তে ‘তারকা’ সাংবাদিক, কলাম লেখক ও উপস্থাপকরা রয়েছেন, আর অন্যপ্রান্তে রয়েছেন অপেক্ষাকৃত অপরিচিত সাংবাদিকরা।

উদ্যোক্তাভিত্তিক

এই ঝুঁকির জবাব হিসাবে অনেক নিউজফ্লুয়েন্সারই তাঁদের আয় নিশ্চিত করতে উদ্যোক্তাদের মতো বিভিন্নভাবে পরীক্ষা-নিরীক্ষা চালান। এর মধ্যে রয়েছে ব্র্যান্ড স্পন্সরশিপ, মার্চেন্ডাইজ এবং লাইভ শো (Glatt and Banet-Weiser 2021, 44)। যেমন অস্ট্রেলিয়ান রাজনৈতিক কনটেন্ট ক্রিয়েটর ফ্রেন্ডলিজর্ডিজ প্রায়ই নিজের লাইভ শো আয়োজন করেন এবং ব্র্যান্ডেড মার্চেন্ডাইজ বিক্রি করেন। অন্যদিকে, হাসান পাইকারও ব্র্যান্ডেড টি-শার্ট বিক্রি করেন। যৌথভাবে পডকাস্ট আয়োজন করার মতো কনটেন্ট কোলাবোরেশনও নতুন দর্শক এবং ব্র্যান্ড স্পন্সর পাওয়ার আরেকটি উপায়। এসব বৈচিত্র্যময় এবং উদ্যোক্তানির্ভর আয়ের উৎস কিছুটা হলেও এই

নিউজফ্লুয়েসারদের অর্থনৈতিক স্থিতিশীলতা এনে দিতে সাহায্য করে (Glatt and Banet-Weiser, 2021)।

নিউজফ্লুয়েসারদের মাধ্যমে দেখা যায় কীভাবে একই ব্যবসায়িক কৌশল নিউজ ইন্ডাস্ট্রি এবং অনলাইনের কনটেন্ট ক্রিয়েটরদের মধ্যে কাজ করে। তবে এই সাফল্যও সাধারণ কিছু বিষয়ের ওপর নির্ভরশীল, যার মধ্যে রয়েছে ব্র্যান্ড পরিচিতি এবং একাধিক প্ল্যাটফরমে দর্শককে আকৃষ্ট করার দক্ষতা। এই অভিন্ন ব্যবসায়িক মডেলগুলোর কারণে শ্রমের ধারায়ও মিল দেখা যাচ্ছে।

শ্রম: স্ব-ব্র্যান্ডিং, সম্পর্কনির্ভরতা এবং আবেগের তাড়না

প্রতিকূল সংবাদশিল্পের প্রতিক্রিয়ায় স্ব-ব্র্যান্ডিং, সম্পর্কভিত্তিক এবং আবেগতাড়িত শ্রমপদ্ধতির উদ্ভব হয়েছে। এগুলোই নিউজফ্লুয়েসারদের তৃতীয় বৈশিষ্ট্য।

স্ব-ব্র্যান্ডিং

পরিচিত ও বাজারযোগ্য ‘ব্র্যান্ড’ গড়ে তুলতে নিউজফ্লুয়েসাররা সামাজিক যোগাযোগমাধ্যমের নেটওয়ার্কিং এবং পার্সোনালাইজেশনের সুবিধাকে কাজে লাগিয়ে ‘সেলফ ব্র্যান্ডিং’ করে থাকেন। এই স্ব-ব্র্যান্ডিং বলতে বোঝানো হয় এমন কাজগুলোকে, যেগুলোর মাধ্যমে সাংবাদিক, ফ্রিল্যান্সার ও কনটেন্ট ক্রিয়েটররা নতুন দর্শকদের কাছে পৌঁছান, নিজের বা প্রতিষ্ঠানের ব্র্যান্ড প্রচার করেন, ডিজিটাল জগতের বিশাল ভিড়ের মধ্যে নিজস্ব পরিচিতি গড়ে তোলেন অথবা অনলাইনে নিজেদের ‘ইমেজ’ ঠিক রাখেন (Molyneux, Holton, and Lewis 2018)। অনেক নিরাপদ চাকরিতে থাকা সাংবাদিকও স্বেচ্ছায় সেলফ ব্র্যান্ডিং করেন, অনেক সময় প্রতিষ্ঠানও তা করতে উৎসাহিত করে। কিন্তু ফ্রিল্যান্সারদের জন্য সেলফ ব্র্যান্ডিং অত্যন্ত প্রয়োজনীয়। উদ্দেশ্য যাই হোক, স্ব-ব্র্যান্ডিং একজন ব্যক্তিকে বাজারযোগ্য করে তোলে (Molyneux, Holton, and Lewis, 2018, 1389)।

স্ব-ব্র্যান্ডিং অবশ্য প্রথাগত সাংবাদিকতার নীতির সঙ্গে সাংঘর্ষিক হতে পারে (Molyneux, Holton, and Lewis, 2018)। যেমন: সাংবাদিকতার ক্ষেত্রে ‘স্ব-ব্র্যান্ডিং’ প্রায়ই এমন একধরনের ‘স্বকীয়তা’ তুলে ধরে, যেখানে ব্যক্তিগত ও পেশাদার জীবন খোলাখুলিভাবে মিশে যায়। এর মধ্যে ব্যক্তিগত তথ্য, পছন্দ, ছবি, এমনকি বিতর্কিত মতামতও ভাগ করে নেওয়া হয়। দর্শকদের সঙ্গে সম্পর্ক স্থাপনের জন্য হাস্যরসও ব্যবহার করা হয়। এর ফলে এ ধরনের ‘স্বকীয়’ চর্চাগুলো সাংবাদিকতার ঐতিহ্যবাহী মূল্যবোধ, যেমন: ‘বস্তুনিষ্ঠতার’ (objectivity) সঙ্গে সাংঘর্ষিক হতে পারে। এ সত্ত্বেও কিছু সাংবাদিক ও লেখক সামাজিক যোগাযোগমাধ্যমে সফলভাবে নিজেদের ব্র্যান্ডিং গড়ে তুলেছেন। ক্যাসি নিউটনসহ অন্য নিউজলেটার লেখকরা নিজেদের এত বড়ো ব্র্যান্ড হিসাবে প্রতিষ্ঠিত করেছেন যে তাঁরা নিজেরাই আর্থিকভাবে স্বনির্ভর হতে পেরেছেন। আবার কিছু অপ্রথাগত নিউজফ্লুয়েসারও খোলাখুলিভাবে হাস্যরসাত্মক বা মতামতভিত্তিক সেলফ ব্র্যান্ড গড়ে তোলেন। পাইকার এবং ফ্রেন্ডলিজার্ডিজ উভয়েই তাঁদের কৌতুকপূর্ণ আচরণ, স্পষ্ট রাজনৈতিক অবস্থান এবং ‘মিম’ বোঝার ক্ষমতার জন্য পরিচিত। তাই নিউজফ্লুয়েসারদের সেলফ ব্র্যান্ডিং করার প্রবণতা নিউজ ইন্ডাস্ট্রিতে সেলফ ব্র্যান্ডিং-এর গুরুত্বকেই আরও জোরদার করে তোলে।

সম্পর্কনির্ভরতা

একটি ‘ব্র্যান্ড’ বাজারজাত করতে হলে নিউজফ্লুয়েসারকে তাঁদের দর্শকদের সঙ্গে সম্পর্ক গড়ে তুলতে হয়। এ বিষয় নিয়ে গবেষণা করা

একাধিক গবেষক এই কাজকে ‘রিলেশনাল লেবার’ বা সম্পর্কভিত্তিক শ্রম হিসাবে আখ্যা দিয়েছেন (Baym, 2015)। বেইম বলেন, সাংবাদিকতার নিজের ব্র্যান্ডিং-এর মতোই এই কাজটিও অনলাইন দর্শকের সঙ্গে সম্পর্ক গড়তে প্রত্যাশিত হলেও ‘বেশির ভাগ ক্ষেত্রেই সরাসরি লাভজনক না’ (2015, 14)। ইউটিউবার এবং অন্যান্য অনলাইন কনটেন্ট ক্রিয়েটরও এই ধরনের সম্পর্কনির্ভর এবং ‘আবেগতাড়িত’ পরিশ্রম করেন (Cunningham and Craig, 2017)। আমরা পাইকারের উদাহরণ থেকেও দেখি, এই সম্পর্কনির্ভর এবং ‘অথেনটিক’ পরিশ্রম নিউজফ্লুয়েসারদের মধ্যেও দেখা যায়, যেখানে ‘অথেনটিসিটি’ তৈরি হয় ব্যবহারকারীদের সঙ্গে তাৎক্ষণিক সংযোগ তৈরি এবং স্বচ্ছতার সাহায্যে একটি ‘বাস্তব’ ইমেজ গড়ে তোলার মাধ্যমে (পাইকারের ক্ষেত্রে দীর্ঘ নির্বাচনি লাইভস্ট্রিমে তাঁর বিশৃঙ্খল ট্যাবগুলো দেখানো)। যারা প্যাট্রিয়নে সাবস্ক্রিপশন আয়ের ওপর খুব বেশি নির্ভরশীল, তাঁদের জন্যও খরচে সাবস্ক্রাইবারদের সঙ্গে সম্পর্ক বজায় রাখার কাজটিও একধরনের সম্পর্কনির্ভর শ্রম হয়ে দাঁড়ায়।

আবেগের তাড়না

ব্যক্তিনির্ভরতা এবং অনিশ্চিত শ্রমকে যৌক্তিক বা সহনীয় হিসাবে তুলে ধরতে ‘আবেগ’ বা প্যাশন এবং ‘স্বাধীনতা’ শব্দ দুইটি প্রায়ই ব্যবহৃত হয়। বড়ো মাপের নিউজলেটার লেখকদের ক্ষেত্রে এমন বিষয় দেখা যায়। যেমন: সাংবাদিক চার্লি ওয়ার্জেল ব্যাখ্যা করেছেন কীভাবে ব্যক্তিকেন্দ্রিক কাজ তাঁকে নিজের একটি জগৎ গড়ে তুলতে সাহায্য করেছে, যেখানে তিনি নিজের মতো করেই লিখতে পারেন (Klein, 2021)। আবার সাবস্ট্যাক যখন ক্যাসি নিউটনকে বলেছিল তারা নিউটনকে নিজের ‘ভাগ্য নিয়ন্ত্রণে’ সাহায্য করবে, তখনই নিউটন দ্য ভার্জের চাকরি ছেড়ে সাবস্ট্যাকে নিজের অ্যাকাউন্টে লেখা শুরু করেন (Jeong, 2020)। ফ্রিল্যান্স সাংবাদিকদের জন্যও এ ধরনের আবেগ বা প্যাশনের ধারণা তাঁদের অনিশ্চিত এবং কম পারিশ্রমিকের কাজ চালিয়ে যাওয়ার প্রেরণা হয়ে দাঁড়ায় (Schapals, 2022)। নিউজফ্লুয়েসারদের এই শ্রম প্ল্যাটফর্মভিত্তিক স্ব-ব্র্যান্ডিং এবং সম্পর্কনির্ভর পরিশ্রমের সঙ্গে সংযুক্ত। নিজের পছন্দ/প্যাশনের পেছনে ছোট্ট ‘স্বাধীনতা’র যে বয়ান, সেটাই এই শ্রমকে চালিত করছে।

সংস্কৃতি: ভক্তকেন্দ্রিকতা ও প্যারাসোশ্যালিটি

বিগত দুই দশকে সংবাদদাতারা ডিজিটাল জগতে সক্রিয় এবং অংশগ্রহণকারী দর্শকদের সঙ্গে ‘পারস্পরিক’ সম্পর্ক গড়ে তোলার চেষ্টা করেছেন (Carlson, 2018)। নিউজফ্লুয়েসাররা এই প্রবণতাকে ভক্ত কেন্দ্রিক সংস্কৃতির (fandom culture) এবং ‘প্যারাসোশ্যালিটির’ (parasociality) প্রেক্ষাপটে আরও প্রসারিত করেছেন। এই সংস্কৃতিগুলোই নিউজফ্লুয়েসারদের চতুর্থ বৈশিষ্ট্য।

ভক্তকেন্দ্রিক সংস্কৃতি

অর্থ উপার্জনকারী গ্রাহক পেতে অনেক নিউজফ্লুয়েসারকে সক্রিয়, অনুগত এবং অংশগ্রহণমূলক শ্রোতা—অন্য কথায়, ফ্যানডম তৈরি করতে হয়। উদাহরণস্বরূপ, যেসব নিউজলেটার লেখক ‘একক’ (solo) কাজ শুরু করেছেন, তাঁদের জন্য একটি আগ্রহী, সক্রিয় এবং অর্থ প্রদানকারী শ্রোতাগোষ্ঠী তৈরি করা খুবই গুরুত্বপূর্ণ। অনুগত ও সক্রিয় শ্রোতা সংগ্রহ করার এই প্রবণতা এক দশক ধরে চলে আসা ‘পরিমাপযোগ্য সাংবাদিকতার’ (measurable journalism) বৈশ্বিক ধারাকে আরও প্রসারিত করেছে (Carlson, 2018)। একই সঙ্গে এটি

অনলাইন কনটেন্ট ক্রিয়েটরদের অডিয়েন্স কৌশলের সঙ্গেও মিলে যায়, যেখানে অডিয়েন্সের আনুগত্য ধরে রাখতে পারা ভিউ, এনগেজমেন্ট, মার্চেন্ডাইজ বিক্রি এবং সর্বোপরি আয়ের জন্য গুরুত্বপূর্ণ। প্যাট্রিয়নের মতো প্ল্যাটফর্ম ফ্যানডম থেকে আয় করার অবকাঠামো হিসেবেও গুরুত্বপূর্ণ হয়ে উঠছে। এভাবে অনলাইন ফ্যানডম এখন কেবল সিনেমা, কমিক, টিভি শো, সংগীতশিল্পীদের ঘিরে গড়ে ওঠা নিশ সাবকালচার নয়, বরং এর কাঠামো ও অর্থনৈতিক মডেলের মাধ্যমে অনলাইন কনটেন্ট নির্মাণ এবং সংবাদ তৈরিতেও প্রভাবিত করছে।

প্যারাসোশ্যালিটি

নিউজফ্লুয়েন্সার ও তাঁদের ভক্তদের মধ্যে ‘প্যারাসোশ্যাল’ সম্পর্কও নিউজফ্লুয়েন্সার সংস্কৃতির আরেকটি মূল উপাদান। এই সম্পর্কগুলো প্যারাসোশ্যাল কারণ, এগুলো মিথস্ক্রিয়ামূলক হলেও অনেকটাই একতরফা; কারণ এখানে যোগাযোগ ‘এক থেকে অনেক’ পদ্ধতিতে হয়, ফলে এগুলো পারস্পরিক যোগাযোগ হয়ে উঠতে পারে না (Rihl and Wegener, 2019)। এই সম্পর্কগুলো প্রায়ই কনটেন্ট নির্মাতা ও দর্শকদের মধ্যে কৃত্রিম ঘনিষ্ঠতার ভিত্তিতে গড়ে ওঠে, যা প্ল্যাটফর্মগুলোর গাঠনিক অবস্থার কারণে তৈরি হয়। যেমন: পাইকারের টুইচ স্ট্রিমে দেখা যায় দর্শকরা স্ট্রিমারে পাইকারের সঙ্গে আলাপ করতে ও মিম শেয়ার করতে জড়ো হন, যেখানে মাঝেমাঝে পাইকার লাইভে কয়েকজন দর্শকের প্রশ্নের জবাব দেন। টুইটারেও এই প্যারাসোশ্যাল ফ্যানডমের গতিশীলতা দেখা যায়, যেখানে পাইকার বা ফ্রেন্ডলিজর্ডিজের অনুসারীরা অসম সম্পর্কের মাধ্যমে যোগাযোগ করে।

অন্য যে কোনো ভক্তকেন্দ্রিকতার মতোই এই প্যারাসোশ্যাল ভক্তকেন্দ্রিকতাও কিছু কিছু ক্ষেত্রে ক্ষতিকরও হতে পারে। যেমন: অনেক সময়ই কোনো কনটেন্ট ক্রিয়েটরের ভক্তরা অন্য কনটেন্ট ক্রিয়েটরদের ভক্তদের সঙ্গে অনলাইন দ্বন্দ্ব জড়িয়ে পড়ে। এই ধরনের ‘নাটক’ ইউটিউবজগতে অনেকদিন ধরেই প্রচলিত এবং এটা এতটাই যে ‘নাটকে চ্যানেল’ বলে একটি আলাদা ভিডিয়ার ঘরানাই তৈরি হয়েছে, যেগুলোয় অনলাইনের এসব দ্বন্দ্ব নিয়ে আলোচনা করা হয় (Lewis, 2020)। যেমন: ফ্রেন্ডলিজর্ডিজ আর তাঁর ভক্তরা রক্ষণশীল রাজনীতিকদের মতো পরিচিত ব্যক্তিদের সঙ্গে দ্বন্দ্ব জড়িয়ে পড়ে পরিচিতি পেয়েছেন। এই অনলাইন দ্বন্দ্বগুলোও সাংবাদিক, লেখক, তাঁদের ফ্যান ও ‘অ্যান্টি ফ্যান’দের মধ্যেও ক্রমশ দৃশ্যমান হচ্ছে (Pyo, 2023)। যেমন: টুইটার আর সাবস্ট্যাকের পালটাপালটি পোস্টে মার্কিন সাবস্ট্যাক লেখক গ্লেন গ্রিনওয়াল্ডের ভক্ত আর সমালোচকদের মধ্যে দ্বন্দ্ব ছড়িয়ে পড়েছিল। এই দ্বন্দ্ব নিউজফ্লুয়েন্সার ব্যবসায়িক মডেলের সঙ্গেও যুক্ত। ফ্রেন্ডলিজর্ডিজ তাঁর রাজনৈতিক প্রতিপক্ষদের কাটুন

আঁকা টি-শার্ট তাঁর ফ্যান বা ভক্তদের কাছে বিক্রি করেন। এগুলো প্রমাণ করে যে প্ল্যাটফর্মের এনগেজমেন্টের ওপর নির্ভর করে তৈরি হওয়া এসব অনলাইন ‘ড্রামা’র সংস্কৃতি সাব-কালচারের সীমা ছাড়িয়ে নিউজ ইন্ডাস্ট্রিতেও ঢুকে পড়েছে এবং নিউজফ্লুয়েন্সার সংস্কৃতি এখানে গুরুত্বপূর্ণ ভূমিকা পালন করছে।

তবে ভক্তরা কেবল ব্যক্তিগত ‘নাটক’-এর জন্যই নয়, রাজনৈতিক ও সামাজিক উদ্দেশ্যেও ব্যবহার হতে পারে। যেমন: ২০২৩ সালের জানুয়ারিতে ব্রাজিলের প্রেসিডেন্সিয়াল প্রাসাদে বলসোনারোর উগ্র সমর্থকদের হামলার পর ইউটিউবার ফেলিপে নেতো-সহ অন্য রাজনৈতিক ইনফ্লুয়েন্সাররা ভিডিয়ো ফুটেজ দেখে হামলাকারীদের শনাক্ত করতে ভক্তদের আহ্বান জানিয়েছিলেন (Downie, 2023)।

আলোচনা

বিশেষ প্রযুক্তিগত, অর্থনৈতিক ও সাংস্কৃতিক প্রেক্ষাপটের কারণে সংবাদ ও অনলাইন কনটেন্ট তৈরি এখন একে অপরের সঙ্গে সংযুক্ত হচ্ছে এবং একে অপরকে রূপান্তর করছে। এই রূপান্তর থেকেই ‘নিউজফ্লুয়েন্সার’-এর ধারণার উদ্ভব; যা কিনা সংবাদ তৈরির এক নতুন মডেল। এ মডেলটি প্ল্যাটফর্মনির্ভর, ঝুঁকিপূর্ণ এবং অংশগ্রহণমূলক প্রেক্ষাপটে গড়ে উঠেছে। ‘নিউজ’ ও ‘ইনফ্লুয়েন্সার’-এর সংমিশ্রণে তৈরি শব্দটি এ দুইয়ের সংকর অবস্থাকেই নির্দেশ করে। এই ব্যক্তির কেবল ইনফ্লুয়েন্সার নন, যাঁরা শুধু সংবাদ নিয়ে কনটেন্ট তৈরি করেন, যদিও তাঁদের কাউকে কাউকে ‘সাংবাদিক কম ইনফ্লুয়েন্সার বেশি’ মনে হতে পারে। আবার যাঁরা সাংবাদিক, তাঁরা নিজেদের সেলফ ব্র্যান্ডিং করলেও বা সাবস্ক্রিপশন প্ল্যাটফর্ম ব্যবহার

করলেও সবাই ইনফ্লুয়েন্সার হয়ে ওঠছেন না। বরং আমরা চারটি মৌলিক দিক—প্ল্যাটফর্ম, ব্যবসায়িক মডেল, শ্রমের ধরন এবং সংস্কৃতির একটি কেন্দ্রিকতা দেখতে পাচ্ছি, যা ইনফ্লুয়েন্সার সংস্কৃতি ও নিউজ ইন্ডাস্ট্রি দুটোকেই রূপান্তর করছে।

গত দশকে রাজনৈতিক কনটেন্ট প্রচার করা বহু ইউটিউবার এই রূপান্তরের উদাহরণ (Lewis, 2020)। তাঁরা সংবাদ ও রাজনীতি বিষয়ের ওপর বিশেষভাবে কনটেন্ট তৈরি করেছেন, অনেক সময় স্বীকৃতিও পেয়েছেন, প্রথাগত সংবাদমাধ্যমে বিশেষজ্ঞ হিসাবে উদ্ধৃত হয়েছেন, এমনকি রিপোর্টিংয়ের জন্য সরকারি অনুদানও পেয়েছেন (Lichtenstein, Herbers, and Bause, 2021)।

তাই ‘নিউজফ্লুয়েন্সার’ শব্দটি কেবল একটি পরিচয় নয়, বরং একটি বড়ো রূপান্তরের নির্দেশকও। নিউজফ্লুয়েন্সারদের সঙ্গে জড়িয়ে থাকা বিভিন্ন ধারণার মধ্যকার অস্পষ্টতা ও বিভ্রান্তি দূর করতেও এই শব্দটি সহায়ক হিসাবে কাজ করে। আগেই উল্লেখ করা হয়েছে, গত কয়েক বছরে এই সংবাদ ও ইনফ্লুয়েন্সিংয়ের সীমানা ভেঙে ফেলা ব্যক্তিদের প্রতি বাড়তি মনোযোগ দেওয়া হয়েছে, তবে

গবেষণাগুলো সাধারণত এসব ব্যক্তি এবং নির্দিষ্ট প্ল্যাটফর্ম ঘিরেই সীমিত ছিল (Lichtenstein, Herbers, and Bause, 2021; Fischer, Kolo, and Mothes, 2022)। ‘নিউজফ্লুয়েন্সার’ শব্দটি এই গবেষণাগুলোকে একটি নির্দিষ্ট ধারণাগত কাঠামোয় একত্রিত করতে সাহায্য করে।

নিউজফ্লুয়েন্সারদের আমরা ডিজিটাল সাংবাদিকতা গবেষণার অংশ হিসেবেও ধরতে পারি, যেটি অংশগ্রহণমূলক ইন্টারনেটের প্রেক্ষাপটে সাংবাদিকতার ‘সীমানা’ নির্ধারণে কাজ করেছে। আগের যুগের ‘ব্লগার’ এবং ‘প্রডিউসার’ (producer)-এর মতো শব্দসংমিশ্রণের (Bruns, 2008) মতোই নিউজফ্লুয়েন্সার শব্দটিও ডিজিটাল সাংবাদিকতা গবেষণার প্রবণতাটি ধরে রেখেছে, যা এই ক্ষেত্রের ‘অনিশ্চয়তা, অস্পষ্টতা ও অস্বস্তি’ তুলে ধরে (Witschge et al., 2016, 1)। একই সঙ্গে এটি ডিজিটাল সাংবাদিকতা গবেষণার বিভিন্ন ধারা, যেমন: ‘সেলফ ব্র্যান্ডিং’ কৌশল (Bruns, 2012), ‘সম্পর্কনির্ভর’ সাংবাদিকতা (Lewis, 2019), ‘পরিমাপযোগ্য’ সাংবাদিকতা (Carlson, 2018), প্ল্যাটফর্মাইজেশন (Willig, 2022), এবং বুকিকে (Hayes and Silke, 2019) একত্রিত করে ইনফ্লুয়েন্সার ও ফ্যানডম গবেষণার মধ্যে যোগসূত্র তৈরি করে। নিউজফ্লুয়েন্সার ধারণার মাধ্যমে বোঝা যায়, যারা ডিজিটাল সাংবাদিকতার নতুন রূপান্তর বুঝতে চান, তাঁদের অনলাইন কনটেন্ট নির্মাতাদের নিয়ে কাজ করা গবেষকদের সঙ্গে আরও গভীরভাবে যুক্ত হওয়া প্রয়োজন। কারণ, এই গবেষকরা কালচারাল স্টাডিজ, ডিজিটাল অ্যাস্ট্রোপলজি বা ক্রিটিক্যাল মিডিয়া স্টাডিজের মতো ভিন্ন ভিন্ন ক্ষেত্র থেকে এসেছেন (Abidin, 2021)।

এখন প্রশ্ন হলো, আমরা কীভাবে নিউজফ্লুয়েন্সারদের সাংবাদিকতাগত সম্ভাবনাকে মূল্যায়ন করব? অনেক দিক থেকেই নিউজফ্লুয়েন্সাররা একটি দ্ব্যর্থবোধক ঘটনা। প্রথমত, যেসব নিউজফ্লুয়েন্সারের তারকা খ্যাতি নেই, তাঁদের জন্য এই ব্যক্তিকেন্দ্রিক ও বুকিপূর্ণ পরিশ্রমের বিষয়টি উদ্বেগজনক। তারকা নিউজফ্লুয়েন্সার ম্যাট তাইবিস এবং পাইকারের সঙ্গে তুলনামূলক ছোট ফ্রিল্যান্সার ও ইউটিউবারদের মধ্যে যে স্পষ্ট বিভাজন রয়েছে, তা আরও বৈষম্যমূলক নিউজ ইন্ডাস্ট্রির ইঙ্গিত দিচ্ছে। তবে যদি নিউজফ্লুয়েন্সাররা টুইচের মতো তরুণ অডিয়েন্সনির্ভর অনলাইন প্ল্যাটফর্মে কার্যকরভাবে সংবাদ কনটেন্ট তৈরি করতে পারে, তাহলে সাংবাদিকতা আরও অন্তর্ভুক্তিমূলক হয়ে উঠতে পারে (Hurcombe, 2022)। নিউজফ্লুয়েন্সারদের ‘অথেনটিক’, নিজস্ব এবং স্বচ্ছ উপস্থাপনাও এই দর্শকদের কাছে সাংবাদিকতাকে আরও প্রাসঙ্গিক ও অ্যাকসেসিবল করে তুলতে পারে। যারা প্রথাগত সংবাদমাধ্যম পড়েন না (Digital News Report, 2023), তাঁদের সঙ্গেও যুক্ত হওয়ার সুযোগ করে দেয় এই ধারা। পাইকার, ফ্রেন্ডলিজর্ডিজ বা নেতোর মতো নিউজফ্লুয়েন্সারদের জনপ্রিয়তা দেখিয়ে দিয়েছে কীভাবে তরুণরা প্ল্যাটফর্মের ভেতরে ঢুকে সংবাদ গ্রহণ করে। ‘সংবাদ থেকে মুখ ফিরিয়ে নিয়েছে জনগণ’—এমন ধারণার বাইরে গিয়ে সংবাদ গ্রহণের একটি জটিল চিত্র বের করে আনা সম্ভব এই ধারা বিশ্লেষণ করে।

তবে নিউজফ্লুয়েন্সারদের ‘অথেনটিক’ উপস্থাপনা প্রথাগত সাংবাদিকতার ‘নিরপেক্ষতা’ ধারণার সঙ্গে সাংঘর্ষিক হতে পারে। সাংবাদিকতার এই প্রথাগত ধারণা থেকে বেরিয়ে আসার প্রবণতা এবং ভক্তকেন্দ্রিক সংস্কৃতি ইতোমধ্যেই তাঁদের ‘নিরপেক্ষতা’ নিয়ে উদ্বেগ তৈরি করেছে। গ্লেন গ্রিনওয়াল্ড ও ফ্রেন্ডলিজর্ডিজ দুজনেই রাজনৈতিকভাবে পক্ষপাতদুষ্ট এবং অত্যন্ত সক্রিয় ও অনুগত দর্শকের জন্য পরিচিত। এর মাধ্যমে নিউজফ্লুয়েন্সাররা ক্রমেই

বিভক্ত ও পক্ষপাতদুষ্ট সংবাদজগতকে আরও দূষিত, পক্ষপাতদুষ্ট ও বিভক্ত করে ফেলতে পারে। যেমন: যুক্তরাষ্ট্রের অ্যান্ডি এনগো এবং অস্ট্রেলিয়ার আভি ইয়েমেনির মতো আরও কিছু নিউজফ্লুয়েন্সার তাঁদের রাজনৈতিক ও আর্থিক স্বার্থে সাংবাদিকতার সামাজিক মর্যাদাকে ব্যবহার করছেন। এসব ব্যক্তি ভ্যাকসিনসহ বিভিন্ন বিষয়ে মিথ্যা বা বিভ্রান্তিকর তথ্য ছড়ানোর অভিযোগের মুখে পড়েছেন (Maurice, 2019)। অর্থাৎ, নিউজফ্লুয়েন্সারদের যে অস্পষ্ট জায়গা ও অনির্ধারিত পরিচয় রয়েছে, তা কখনো কখনো ভুল তথ্য প্রচারের বাহক হয়ে উঠতে পারে। ‘নাগরিক’ ও ‘বিকল্প’ সাংবাদিকদের মতো নিউজফ্লুয়েন্সাররাও নতুন অডিয়েন্স তৈরি করতে এবং মূলধারার গণমাধ্যমে উপেক্ষিত ইস্যুগুলো আলোচনায় আনতে সক্ষম হলেও নিউজফ্লুয়েন্সারের আচরণবিধির বাইরে থাকার কারণে তাঁদের আচরণ সমস্যাজনক হয়ে উঠতে পারে।



নিউজফ্লুয়েন্সাররা সাংবাদিকতার পরিবর্তনশীল সীমানা নিয়েও প্রশ্ন তোলেন। উদাহরণস্বরূপ, ফ্রিল্যান্সারদের মধ্যে নিউজফ্লুয়েন্সার মডেলটি কতটা জনপ্রিয়? এবং ইউটিউবার ও অন্যান্য অনলাইন কনটেন্ট নির্মাতারা কি সরকারি তহবিল বা ঐতিহ্যবাহী সংবাদমাধ্যমের সঙ্গে অংশীদারত্বের মাধ্যমে প্রাতিষ্ঠানিক ‘বৈধতা’ অর্জন করছেন?

দ্বৈধতার (ambivalence) কারণেই নিউজফ্লুয়েন্সাররা সাংবাদিকতা অধ্যয়নের জন্য বেশকিছু আকর্ষণীয় প্রশ্ন সামনে নিয়ে এসেছেন। এর মধ্যে রয়েছে নিউজফ্লুয়েন্সার কনটেন্ট সম্পর্কিত প্রশ্ন, যেমন: নিউজফ্লুয়েন্সাররা কোন ফরম্যাট, স্টাইল এবং বিষয়গুলোকে বেশি পছন্দ করেন এবং তাঁদের কাভারেজে কোনো গুরুত্বপূর্ণ ফাঁক আছে কি না।

নিউজফ্লুয়েন্সাররা সাংবাদিকতার পরিবর্তনশীল সীমানা নিয়েও প্রশ্ন তোলেন। উদাহরণস্বরূপ, ফ্রিল্যান্সারদের মধ্যে নিউজফ্লুয়েন্সার মডেলটি কতটা জনপ্রিয়? এবং ইউটিউবার ও অন্যান্য অনলাইন কনটেন্ট নির্মাতারা কি সরকারি তহবিল বা ঐতিহ্যবাহী সংবাদমাধ্যমের সঙ্গে অংশীদারত্বের মাধ্যমে প্রাতিষ্ঠানিক ‘বৈধতা’ অর্জন করছেন?

নিউজফ্লুয়েন্সাররা সংবাদের রাজনৈতিক অর্থনীতি নিয়েও প্রশ্ন উত্থাপন করেন। নিউজফ্লুয়েন্সার মডেল কি সংবাদশিল্পে বিদ্যমান বৈষম্যগুলোকে আরও তীব্র করেছে নাকি নতুন বৈষম্য তৈরি করেছে? প্রায়ই জড়িত অনিশ্চয়তা (precarity) বিবেচনা করলে এটি কি শেষ পর্যন্ত টেকসই?

ভবিষ্যতের দিকে নজর

দ্বৈধতার (ambivalence) কারণেই নিউজফ্লুয়েন্সাররা সাংবাদিকতা অধ্যয়নের জন্য বেশকিছু আকর্ষণীয় প্রশ্ন সামনে নিয়ে এসেছেন। এর মধ্যে রয়েছে নিউজফ্লুয়েন্সার কনটেন্ট সম্পর্কিত প্রশ্ন, যেমন— নিউজফ্লুয়েন্সাররা কোন ফরম্যাট, স্টাইল ও বিষয়গুলোকে বেশি পছন্দ করেন এবং তাঁদের কাভারেজে কোনো গুরুত্বপূর্ণ ফাঁক আছে কি না। নিউজফ্লুয়েন্সাররা সাংবাদিকতার পরিবর্তনশীল সীমানা নিয়েও প্রশ্ন তোলেন। উদাহরণস্বরূপ, ফ্রিল্যান্সারদের মধ্যে নিউজফ্লুয়েন্সার মডেলটি কতটা জনপ্রিয়? এবং ইউটিউবার ও অন্যান্য অনলাইন কনটেন্ট নির্মাতারা কি সরকারি তহবিল বা প্রথাগত সংবাদমাধ্যমের সঙ্গে অংশীদারত্বের মাধ্যমে প্রাতিষ্ঠানিক ‘বৈধতা’ অর্জন করছেন? নিউজফ্লুয়েন্সাররা সংবাদের রাজনৈতিক অর্থনীতি নিয়েও প্রশ্ন উত্থাপন করেন। নিউজফ্লুয়েন্সার মডেল কি সংবাদশিল্পে বিদ্যমান বৈষম্যগুলোকে আরও তীব্র করছে নাকি নতুন বৈষম্য তৈরি করছে? প্রায়ই জড়িত অনিশ্চয়তা (precarity) বিবেচনা করলে এটি কি শেষ পর্যন্ত টেকসই? সবশেষে নিউজফ্লুয়েন্সাররা সাংবাদিকতার পেশাদার নিয়মাবলিকে চ্যালেঞ্জ জানায়। উদাহরণস্বরূপ, নিউজফ্লুয়েন্সাররা ‘নিউজ রুম’ এবং সাংবাদিকতার ঐতিহ্যবাহী বস্তুনিষ্ঠতার ধারণার জন্য কী অর্থ বহন করে? রাজনৈতিক বা আর্থিক কারণে যারা নিজেদের ‘সাংবাদিক’ বলে দাবি করে, সেসব বিদ্বেষপূর্ণ অভিনে থেকে ‘ভালো’ নিউজফ্লুয়েন্সারদের কীভাবে আলাদা করা যায়? সংক্ষেপে, নিউজফ্লুয়েন্সাররা গবেষকদের সাংবাদিকতার অনুশীলনের সীমানা এবং এর নির্দেশক নিয়মাবলিগুলো অনুসন্ধান ও পুনর্বিবেচনা করতে উৎসাহিত করে।

তথ্যনির্দেশ

Abidin, Crystal. 2015. ‘Communicative Intimacies: Influencers and Perceived Interconnectedness.’ *Ada: A Journal of Gender, New Media, & Technology* 8).

Abidin, Crystal. 2021. “From ‘Networked Publics’ to ‘Refracted Publics’: A Companion Framework for Researching ‘below the Radar’ Studies.” *Social Media + Society* 7 (1): 205630512098445.

Baym, Nancy K. 2015. ‘Connect with Your Audience! The Relational Labor of Connection.’ *The Communication Review* 18 (1): 14–22.

Bishop, Sophie. 2018. ‘Anxiety, Panic, and Self-Optimisation: Inequalities and the YouTube Algorithm.’ *Convergence: The International Journal of Research into New Media Technologies* 24 (1): 69–84.

Bruns, Axel. 2008. ‘The Future is User-Led: The Path towards Widespread Produsage.’ *Fibreculture Journal* 11: 1449–1453.

Bruns, Axel. 2012. ‘Journalists and Twitter: How Australian News Organisations Adapt to a New Medium.’ *Media International Australia* 144 (1): 97–107.

Carlson, Matt. 2018. ‘Confronting Measurable Journalism.’ *Digital Journalism* 6 (4): 406–417.

Cunningham, Stuart, and David Craig. 2017. “Being ‘Really Real’ on YouTube: Authenticity, Community, and Brand Culture in Social Media Entertainment.” *Media International Australia* 164 (1): 71–81.

Digital News Report. 2023. ‘Reuters Institute for the Study of Journalism’.

Downie, Andrew. 2023. ‘Brazil Attack: Influencers Join Online Campaign to Identify Insurrectionists.’ *The Guardian*, January 11.

Fischer, Tasja-Selina, Castulus Kolo, and Cornelia Mothes. 2022.

‘Political Influencers on YouTube: Business Strategies and Content Characteristics.’ *Media and Communication* 10 (1): 259–271.

Hayes, Kathryn, and Henry Silke. 2019. “Narrowing the Discourse? Growing Precarity in Freelance Journalism and Its Effect on the Construction of News Discourse.” *Critical Discourse Studies* 16 (3): 363–379.

Hurcombe, Edward. 2022. *Social News: How Born-Digital Outlets Transformed Journalism*. London: Palgrave. Glatt, Zoe, and Sarah Banet-Weiser. 2021. ‘Productive Ambivalence, Economies of Visibility and the Political Potential of Feminist YouTubers.’ In *Creator Culture: An Introduction to Global Social Media Entertainment*, edited by S. Cunningham & D. Craig, 39–56. New York: New York University Press.

Kafka, Peter. 2021. ‘The Atlantic Wants to Hire Newsletter Writers – and it Wants their Subscribers, too.’ *Vox*, October 9.

Klein, Charlotte. 2021. ‘Substack Just Hit a Major Milestone. Can Big Media Outlets Punch Back?’ *Vanity Fair*, November 16.

Jackson, Gita. 2020. ‘Hasan Piker’s Twitch Stream is the Future of Election Night Coverage.’ *Vice*, November 5.

Jeong, Sarah. 2020. ‘Casey Newton on Leaving The Verge for Substack and the Future of Tech Journalism.’ *OneZero*, September 23.

Leinonen, Salla-Rosa. 2022. ‘Can Journalists Be Influencers? How to Engage Hard-to-Reach Audiences on Social Media.’ *London School of Economics*.

Lewis, Rebecca. 2020. ‘This is What the News Won’t Show You’: YouTube Creators and the Reactionary Politics of Micro-Celebrity.’ *Television & New Media* 21 (2): 201–217.

Lewis, Seth. 2019. ‘Lack of Trust in the News Media, Institutional Weakness, and Relational Journalism as a Potential Way Forward.’ *Journalism* 20 (1): 44–47.

Lichtenstein, Dennis, Martin R. Herbers, and Halina Bause. 2021. ‘Journalistic YouTubers and Their Role Orientations, Strategies, and Professionalisation Tendencies.’ *Journalism Studies* 22 (9): 1103–1122.

Lorenz, Taylor. 2020. ‘How Hasan Piker took over Twitch.’ *The New York Times*, November 14.

Maurice, Emma. 2019. ‘Journalist Suspended from Twitter after Simultaneously Insulting Black and Trans People in Chelsea Clinton Tweet.’ *Pink News*, November 26.

Molyneux, Logan, Avery Holton, and Seth C. Lewis. 2018. ‘How Journalists Engage in Branding on Twitter: Individual, Organisational, and Institutional Levels.’ *Information, Communication & Society* 21 (10): 1386–1401.

Pyo, Jane Y. 2023. ‘Haters as anti-Fans? Accruing Capital through Audiences Who Hate Journalists.’ *Digital Journalism* 1–17. Advance online publication.

Rihl, Alexander, and Claudia Wegener. 2019. ‘YouTube Celebrities and Parasocial Interaction: Using Feedback Channels in Mediatized Relationships.’ *Convergence: The International Journal of Research into New Media Technologies* 25 (3): 554–566.

Schapals, Aljosha Karim. 2022. *Peripheral Actors in Journalism: Deviating from the Norm?* New York: Routledge.

Willig, Ida. 2022. ‘From Audiences to Data Points: The Role of Media Agencies in the Platformisation of the News Media Industry.’ *Media, Culture & Society* 44 (1): 56–71.

Witschge, Tamara, C. W. Anderson, David Domingo, and Alfred Hermida. 2016. ‘Introduction.’ In *The SAGE Handbook of Digital Journalism*, edited by T. Witschge, C. W. Anderson, D. Domingo, and A. Hermida. London: Sage.

[নিবন্ধটি ২০২৪ সালের ১১ সেপ্টেম্বর ডিজিটাল জার্নালিজম জার্নালে “Conceptualising the ‘Newsfluencer’ Intersecting Trajectories in Online Content Creation and Platformised Journalism” শিরোনামে প্রকাশিত হয়]